


島嶼圖形

暇時取閱香港全圖，除可認識各區位置之詳細情形外，每可憑想像，幻出各處島嶼怪異之形，或肖獸，或肖物。以肖獸言，大嶼山一島最為明顯，全島類一企立恐龍，五鼓嶺為首，東涌谷為背，分流角為尾，水口及芝麻灣兩半島為足。香港島則如一跳躍小羊，似與恐龍相拒，南丫島似一玩具狗，人立而舞，其他如南堂肖龜，甕缸似史前怪獸，馬灣如兔，橋咀像海馬。以肖物言，則西貢大頭洲如鈎，娥眉洲似鐮刀，坪洲類曲尺，則不需想像，即可得之，如能乘直昇機自高處俯覽，當較凝視平面地圖更易按地賦名。


空中俯瞰馬灣



印洲塘

香港境內以風景言，無過吉澳海及印洲塘，尤以印洲塘，水光山色，波平如鏡，風浪不興，如湖如塘，綴以小嶼，為新界東北區以塘為名之三大水域（戶洲塘，澳背塘及印洲塘）中最名實相符之一處，此處四面環山，海形如盆，中立印洲，漁民因以印洲塘名之，由來已久，獨惜近年此地被訛稱印塘海，為旅行界一大憾事，訛名之來，或因港府地圖以印塘海名此水域，然港府地圖訛名特多，即以此區而然，虎王洲誤稱湖洋洲，填洲竟曰大稔洲，豈可因其疏漏誤刊而隨之誤，致使此風光秀美，恬靜宜人之印洲塘不能正名。

印洲塘一景



銀洲

香港境內有三銀洲，一在淺水灣外，一在坪洲東南角，另一在海上灣外，三島以淺水灣一處最著名，因每年夏末，例有長途泳賽在此舉行，島南設有大形燈塔，全山密樹，不易登臨，山巔有一坭墩，以天然大石爲基，離地十多呎，以水坭作級供人上下，類此之石墩，境內只有鶴咀嶺一處。坪洲外之銀洲，又名寶島，傳爲張保仔藏金處，此島離坪洲岸邊不遠，海面下有石堤相連，潮退時可涉水而過，面積不大，高不過三十多呎，全爲岩石，東段平順，西面陡峭，環島不見山洞縫隙之類，惟最高處滿長荊棘，不能穿越，未悉其內有無山洞地道，海下灣之銀洲，又名扁洲，島形不扁而類長桿，山脊平順，多長草，間有大石，附近有兩圓島及二石排，磨石洲在東北，蜆洲在正南，燕排遠在西北，爲一出水礁排，上有燈塔，打鐵洲則緊貼在島西南，離岸丈許，水下有沙堤連接，排上巨石參差，可供登臨。

淺水灣銀洲山頂



印洲塘因以爲名之印洲



孖崗洲

淺水灣與春坎灣間山岬外，有三石島離岸獨立，東首一島距岸不過十多呎，西面兩島一小一大，洲名孖崗，由一沙石堤相連，水退時爲一島，潮漲則爲兩嶼，此島在旅行界中似無名聲，然兩島自有其獨特之處，極堪遊賞。

大島在西，高一百多呎，海浪侵蝕之跡極顯，東西兩部幾與中段分離，其狀絕似暴露東海之南果洲及甕缸羣島，島之南岸岩石重疊，海邊平坦如台，可供泊舟，攀石直上半山，撥枝踏草，可至山頂，頂上狹長平順，多矮樹，內望淺水兩灣入目（中灣阻於山咀不可見，外望則銀洲在前，擔担在後，水天空濶，茫無際涯，東首俯瞰小島，有如拱門。

小島高只四十三呎，西坡峭直，壁立三十多呎，中部內陷成一深穴，潮水衝擊，澎然發聲，類如響鐘，或水下有空穴，以致如此，東坡自頂緩降海邊，全島均爲岩石，頂上有短草，西北首海邊有一離岸黑石排，形如一鈎，絕似西貢之大頭洲。

兩島岸邊岩石低陷之處，均用小坭填平，坭面多有刻字，或爲打油詩，或爲格言不等，小島之上尤多，其中一處大書「防瘧局工作告成爲民防疾」，下書年月日，乃知填坭之事，實爲防蚊措施，然海水不能育蚊，此舉似屬多餘。

島嶼遠眺

島遊之樂，固不離親履其地，踏石捫枝，登頂逡目，然若能於登遊之後，擇各島隣近之高地，據頂俯覽，以盡其貌，指認登岸之處，細察全島之形，當另有一番趣味。

賞吉澳海諸島，當取荔枝窩羣背嶺，白角頂及了哥岩頂，賞印洲塘各嶼，當取吉澳黃幌遮頭，往灣七樹環頂。娥眉紅花瀝頂及西流江頂，賞扁洲各島應自串螺角頂，賞甕缸羣島應自糧船灣陰影山，至大王爺墩，餓死鷄頂，純陽峯，老虎頭，水口岬頂各處，則爲遠眺西貢內海大小島嶼，果洲諸島，船灣諸洲，嶼東各嶼及鴉洲羣島不二地點。

孖崗洲之形勢



孖崗洲之沙堤

